

醫說卷第四

宋張杲原著

明王肯堂續輯

勞瘵

五勞

夫人作勞傷於五臟五臟之氣因傷成病故謂之五勞肺勞之狀短氣而面腫不聞香臭肝勞之狀面目乾黑口苦精神不守恐懼不能獨臥目視不明心勞之狀忽忽喜忘大便難或時澹利口内生瘡脾勞之狀舌根苦直不得嚥唾腎勞之狀背難俛仰小便不利赤黃而有餘瀝囊濕生瘡小腹裏急治法肝勞補

心氣心勞補脾氣脾勞補肺氣肺勞補腎氣腎勞補肝氣此療子以益母也經曰聖人春夏養陽秋冬養陰以補其根本肝心爲陽脾肺腎爲陰夫五臟實亦成勞虛則補之實則瀉之

### 六極

六極者筋極主肝脉極主心肉極主脾氣極主肺骨極主腎精極主臟腑筋極之狀令人數轉筋十指手甲皆痛苦倦不能久立脉極之狀忽忽喜忘少顏色眉髮墮落肉極之狀飲食無味不生肌肉皮膚枯槁氣極之狀正氣少邪氣多氣不足多喘少言骨極之

狀腰脊酸削齒痛手足煩痛不欲行動精極之狀肉  
虛少氣喜忘鬢衰落然謂之極者病重於勞也治法  
與治勞同

### 七傷

七傷者一曰大怒逆氣傷肝二曰憂愁思慮傷心三  
曰飲食大飽傷脾四曰形寒飲冷傷肺五曰久坐濕  
地傷腎六曰風雨寒濕傷形七傷曰大怒恐懼傷志  
肝傷則少血目暗心傷則苦驚喜忘脾傷則面黃善  
臥肺傷則短氣咳嗽腎傷則短氣腰痛厥逆下冷形  
傷則皮膚枯槁志傷則恍惚不樂治法與五勞六極

同

虛勞

男子平人脉大爲勞極虛亦爲勞男子勞之爲病其脉浮大手足煩春夏劇秋冬差陰寒精自出痰削不能行寸口脉浮遲浮則爲虛遲則爲勞虛則衛氣不足浮則榮氣竭脉直者遲逆虛也脉澀無陽是腎少寸關澀無血氣逆冷是大虛脉浮微緩而大者勞也脉微濡相搏爲五勞微弱相搏虛損爲七傷

冷勞

冷勞之人氣血枯竭表裏俱虛陰陽不和精氣散失

則內生寒冷也皆由臟腑久虛積冷之氣遂令宿食  
不消心腹積聚臍腹疼痛面色痿黃口舌生瘡大腸  
泄痢手足無力骨節酸疼久而不痊轉加羸瘦故曰  
冷勞

以上雞  
峯方

### 勞症

勞動作也郭逢原曰凡人暫爾疲倦通謂之勞而今  
人以勞爲惡疾而惡聞之親戚朋友共爲隱諱見其  
疾狀莫敢呼之殊不知勞之爲病初起於動作不能  
節謹至於疲倦且傷不已漸成大疾凡言虛勞者五  
勞是也六極七傷爲類蓋蒙莊所謂精太用則竭神

太勞則弊者治法不過補養五臟滋益氣血使之強盛則其疾自去又有傳尸勞者則非此類蓋緣尸疰及挾邪精鬼氣而成者也經曰人有三虛逢年之衰遇月之空失時之和乍感生死之氣或犯鬼物之精大聚寒熱淋露沉沉默默不的知其所苦而無處不惡積月累年漸就委頓旣死之後又復傳疰他人者是也茲又須用通神明去惡氣諸藥以治之經曰草木咸得其性鬼神無所遁情剗射剗犀驅曳邪惡飛丹煉石引納清和疑其爲此疾而設

同上

### 傳勞

葛洪云鬼症者是五尸之一症又挾諸鬼邪爲害其  
病變動乃有三十六種至九十九種大畧使人寒熱  
淋瀝沉沉默默不知所苦無處不惡累年積月漸  
就沉滯以至於死傳與傍人乃至滅門覺如是候者  
急治獺肝一具陰乾杵末服方寸七日三未愈再作  
肘後云此方神良宣和間天慶觀一法師行考召極  
精嚴時一婦人投狀述患人有祟所附須臾召至附  
語云非我爲禍別是一鬼亦因病人命衰爲祟爾渠  
今已成形在患人肺中爲蟲食其肺系故令吐血聲  
嘶師掠之此蟲還有畏忌否久而無語再掠之良久

云容某說惟畏獺爪屑爲末以酒服之則去矣患家如其言而得愈此予目所見也究其患亦相似獺爪者殆獺肝之類歟

本事方

### 遇道人治傳勞方

袁州寄居武節郎李應本相州法司嘗以吏役事韓似夫樞密兵火後忽於宜春見之云從岳侯軍得官今閒居於此從容問其家事潸然淚下曰某先有男女三人長子因議買宅入久空無人所居之室忽覺心動背寒凜凜遂成勞瘵之疾垂殆傳於次室女也長子旣死女病尋亟繼又傳於第三子證候一同應

大恐即禱於城隍神每日設麵飯以齋雲水冀遇異人且許謝錢三十萬數日因往市中開元寺前有一人衣俗士服自稱貧道踵足而呼曰團練聞宅上苦傳尸勞貧道有一藥方奉傳同人寺中問其姓名不答口授云云應即取筆書之道人言欲過湖南應留之飯云已喫飯了欲贈之錢云自有盤纏臨行又言此藥以天靈蓋虎糞內骨爲主切須子細尋覓青蛇腦如無亦可服藥前一日須盛享城隍神求爲陰助應曰旣求之於神何必用藥道人曰不然即揖別西去應以其事頗異敬如其言治藥旣成設五神位具

飲饌十品如待貴客以享城隍又別列酒食以搞飲  
陰兵仍於其家設使者一位於病榻之前服藥食頃  
臟腑大下得蟲七枚色如紅燠肉而腹白長約一寸  
闊七八分前銳後方腹下近前有口身之四周有足  
若魚骨細如針尖而曲已死試取火焚之以鐵火筋  
剗刺不能入病勢頓減後又服一劑得小蟲四枚自  
此遂安今已十年肌體悅澤不復有疾道人後竟不  
求其藥用天靈蓋三錢酥炙黃色爲末秤虎糞內骨  
一錢人骨爲上獸骨次之殺虎大腸內取者亦可用  
同青蛇腦小豆許或菘豆許同酥塗炙色轉爲度無

蛇腦只酥炙亦得鼈甲極大者醋炙黃色爲末秤一兩九肋者尤妙安息香半兩桃仁一分去皮尖研以上爲水絹篩過檳榔一分別爲細末麝香一錢別研青蒿取近梢三四寸細剉六兩豉三百粒葱根二十一箇拍破東引桃柳李桑枝各七莖麤如筋類大各長七寸細剉楓葉二十一片如無亦得童子小便半升右先將青蒿桃柳李桑枝楓葉葱豉以官省升量水三升煎至半升許去滓人安息香天靈蓋虎糞內骨鼈甲桃仁與童子小便同煎取汁去滓有四五合將檳榔麝香同研均調作一服早晨溫服以被蓋覆

出汗恐汗內有細蟲以帛子拭之即焚此帛相次須  
瀉必有蟲下如未死以大火焚之並棄長流水內所  
用藥切不得令病人知日後亦然十來日後氣體復  
圓再進一服依前焚棄至無蟲而止此藥如病者未  
亟可以取安如已亟俟其垂死則令下次已傳染者  
服之先病者雖不可救後來斷不傳染

出百一選方  
韓樞密孫廬

師亞  
卿傳

### 勞傷疾瘵

男子勞傷而得疾瘵漸見瘦瘠用童子小便二盞無  
灰酒一盞以新甕瓶貯之人全猪腰一對內密封泥

日晚以慢火養熟至中夜止五更初更以火溫之發  
瓶飲酒食腰子病篤者只一月效平日瘦怯者亦可  
服此藥蓋以血養血全勝金石草木之藥也

錄  
瑣碎

### 勞復

故督郵頃子獻得病已差諸華佗視脉曰尚虛未復  
復勿爲勞事御內即死臨死當吐舌數寸其妻聞其  
病除從百里外省之宿交接中間三日發病一如

佗言

三國志

### 鬼症

韶州南七十里曰古田有富家婦人陳氏抱異疾常

日無他若每遇微風吹拂則股間一點奇痒爬搔不  
停手已而舉體皆然逮於發厥凡三日醒及坐有聲  
如欬其身乍前乍後若搖兀之狀率以百數甫少定  
又經日始困臥不知人累夕愈至不敢出戶更十醫  
弗效醫劉大用視之曰吾得其證矣先與藥一服取  
念珠一串來病家莫知何用也當婦人搖兀時記其  
疏數之節已覺微減然後云是名鬼疟因人神廟看  
爲邪所憑致精彩蕩越法當用死人枕煎湯飲之既  
飲大瀉數行宿病脫然大用云枕用畢當送還元處  
如遲留使人顛狂蓋但借其氣耳

# 瘰疾

越州鏡湖邵長者女十八染瘰疾累年刺灸無不求治醫亦不效有漁人趙十煮鰻羹與食食覺內熱之病皆無矣今醫家所用鰻煎乃此意

## 尸疰

飛尸者遊走皮膚穿臟腑每發刺痛變作無常遁尸者附骨入肉攻鑿血脉每發不可得近見尸聞喪哀哭便發風尸者淫濯四肢不知痛之所在每發昏沉得風雪便作沉尸者纏骨結臟衝心脇每發絞切遇寒冷便作注尸者舉身沉重精神錯雜常覺昏廢每

節氣致變輒成大惡皆宜用忍冬葉數斛煮取濃汁稠煎服之如雞子大一枚日三太乙神精丹蘇合香丸治此病第一

本事方

### 虛勞用藥

凡虛勞之疾皆緣情慾過度榮衛勞傷致百脉空虚五臟衰損邪氣乘襲致生百疾聖人必假藥石以資氣血密腠理以禦諸邪肌肉之虛猶如體之輕虛如馬敦通草蒲梢燈心之屬是也非滋潤粘膩之物以養之不能實也故前古方中鹿角膠阿膠牛乳鹿髓羊肉飴糖酥酪杏仁煎酒蜜人參當歸地黃門冬之

類者蓋出此意本草云補虛去弱羊肉人參之屬是也所謂虛勞者因勞役過甚而致虛損故謂之虛勞今人才見虛弱疾證悉用燥熱之藥如伏火金石附子薑桂之類致五臟焦枯血氣乾涸而致危困皆因此也如虛而兼冷者止可於諸虛勞方中加諸溫熱藥爲助可也如此即不失古人之意

醫餘

### 鰻治勞疾

有人多得勞疾相因染死者數人取病者於棺中釘之棄於水永絕傳染之患流之金山有人異之引岸開視見一女子猶活因取置漁舍多得鰻鱖魚食之